



## Publicaziuns officialas dils 07-12-2018

---

### Radunonza da vischnaunca

La proxima radunonza da vischnaunca ha liug **venderdis, ils 14 da december 2018** allas 20.00 uras a Sumvitg.

#### **Gliesta da tractandas**

1. Avertura e beinvegni
2. Elecziun da 2 dumbravuschs
3. Approbaziun dil protocol dalla davosa radunonza communal dils 19-06-2018
4. Tractaziun ed approbaziun dil preventiv communal 2019
5. Fixaziun dils peis da taglia 2019
6. Tractaziun ed approbaziun dil project habitar@giuven e concessiun dil credit brut da 670'000 francs
7. Tractaziun ed approbaziun dalla cumpra d'in auto-cistiarna per il corp da pumpiers Sumvitg-Trun e concessiun dil credit brut da 150'000 francs
8. Tractaziun ed approbaziun dil project sanaziun stans da sittar Plaun Petschen e Sulagval e concessiun dil credit brut da 267'000 francs
9. Tractaziun ed approbaziun consultativa dil project via da mistregn a Rabiun-Marias
10. Orientaziuns
11. Varia

Il preventiv 2019 sa vegnir retratgs sin canzlia duront las uras da spurtegl.

Sumvitg, 07-12-2018

*Suprastonza communal*

### Clom da quens

Il quen communal vegn serraus cun **ils 31 da december 2018**. Per saver risguardar las expensas fatgas uonn el quen da gudogn e sperdita ein tut quels che han aunc dabiens viers la vischnaunca supplicai da dar quen sil pli tard entochen ils 14 da december 2018. Nus supplichein tuttas fatschentas sco era ils officials da vischnaunca d'observar quei termin.

Sumvitg, 07-12-2018

*Suprastonza communal*

### Uffeci civil Surselva

#### **Mortori**

**Tuor Filomena**, naschida ils 29-10-1935, morta ils 29-11-2018, stada sesenta a Cumpadials.

Sumvitg, 07-12-2018

*Controlla da habitonts*

## **Damondas per megliurar praus**

Ils 1 da november 2018 ei la nova partiziun dalla meglieraziun ida en vigur. En quei connex han plirs possessurs da praus dumandau la cumissiun da baghegiar schebein ei basegna ina damonda da baghegiar per dismetter tiarms veders, ulivar risteinas eav.

Il president dalla cumissiun da baghegiar ha sclariu quella damonda cun signur Conrad Derungs dil biro d'inschignier Cavigelli . Tenor Conrad Derungs dat ei duas variantas che vegnan per ordinari praticadas tier meglieraziuns.

### **1. Varianta**

Mintga possessur da praus sto fa ina damonda da baghegiar per intents da baghegiar ordeifer la zona da baghegiar (BAB). Quella varianta procura per bia lavur e caschuna grondas taxas per ils possessurs da praus.

### **2. Varianta**

Ils possessurs da praus fan ina damonda cun las indicaziuns detagliadas pertuccont ils intents per megliurar praus alla vischnaunca. La vischnaunca rimna tut quellas damondas ed inoltescha ina damonda communabla.

La suprastonza communal ha examinau las variantas e preferescha la secunda varianta.

Consequentamein supplichein nus tuts possessurs che giavischan ina megliur d'inoltrar ina damonda a scret entochen ils 14 da december 2018. La damonda sto cuntener ina descripziun exacta dallas lavurs previdas. Plinavon duei vegnir aschuntau alla damonda plans da situaziun e fotografias. Damondas cun indicaziuns munglusas e senza las aschuntas necessarias vegnan buca acceptadas.

Las suandontas lavurs vegnan acceptadas cun questa procedura: dismessa da tiarms veders, ulivaziun da risteinas, restructuraziun da mirs schetgs, renaturaziun da vias, trutgs e sendas che vegnan buca pli duvradas per l'agricultura.

Per damondas stattan igl gerau Marcus Duff ni il canzlist communal bugen a disposiziun.

Sumvitg, 07-12-2018

*Departament agricultura*

## **Pignola da Nadal**

L'administraziun forestala recamonda da retrer il pigniel da Nadal al singul vischin sco suonda: En ils vischinadis nua ch'ils pigneuls vegnan pinai entras l'uniun da giuventetgna supplichein da retrer leu il pigniel da Nadal.

Al vischin che vul pinar sez il pigniel (lubiu ei da pinar mo pégn) eis ei lubiu da pinar tal sin territori communal. Ei vegn denton recumandau da pinar sin terren da pastiras surcarschidas. Scumandau eisi da pinar en plontaziuns, uauls da schurmetg e curtins da schurmetg encunter selvaschinas. En uauls privats eisi scumandau da pinar pignola senza ina lubientscha dil possessur d'uaul.

Nus recumandein era da pinar mo in pigniel e quel prender a casa e buca schar scher entuorn e forsa pinar dus auters.

Tgi che vul retrer il pigniel dalla vischnaunca ei supplicaus d'annunziar quei entochen ils mardis, ils 11-12-2018 tier la canzlia communal (tel. 081 920 25 00). Tenor basegns vegn ina part dalla pignola retratga ord ina scola da plontinas. La pignola vegn taxada sco suonda (prezis excl. tpv.):

<b>Grondezia</b>	<b>prezi/toc</b>
< 199 cm	frs. 25.-
200-299 cm	frs. 30-
300 cm	frs. 35.-
325 cm	frs. 45.-
350 cm	frs. 60-
400 cm	frs. 85.-

Per il schurmetg d'igl uaul recumandein a scadin da pinar il pigniel da Nadal cun precauziun e senn da responsabladad. Cunterfatgs vegnan puni tenor il regulativ forestal.

Sumvitg, 07-12-2018

*Uffeci forestal Sumvitg*

## **Uniun da dunnas Sumvitg/Cumpadials**

### **Devoziun d'advent**

La devoziun d'advent ha liug **dumengia, ils 16 da december** allas 17.00 en caplutta da Nossadunna a Clavadi. Ensemen cun la gruppa da liturgia festivein nus la devoziun en baselgia. Silsuenter envidan vischinas e vischins da Clavadi pign e grond ad in sitg. Nus selegrein da star in mument da cumpignia cun Vus e guder la biala atmosfera d'advent. *Uniun da dunnas Sumvitg/Cumpadials*

### **Sentupada d'advent**

#### **Sin Plaz Cadruvi a Surrein**

**Dumengia, ils 23 da december** allas 17.30. Suppa da giutta, fondue, vin cauld ed auter. Cordial bienvegni a tuts vischins fa *la suprastonza dil vischinadi*

### **Controllas per apparats d'udida**

**Gliendisdis, ils 17 da december 2018** saveis Vus schar schubergiar e rugalar Vies apparat d'udida:

9.15–10.30 en Casa sogn Martin a Trun

11.00–11.45 en Casa sogn Giusep a Cumpadials

13.15–14.30 el Puntreis, Center da sanadad a Mustér

Las firmas Amplifon cun dunna Roffler, e Jäggi cun signur Gfeller sorprendan comunablamein quei survetsch gratuit per tuts interessents. Ei drova negina annunzia.

### **Meisa da miezdi (gentar comunabel) dalla Pro Senectute a Cumpadials**

La Pro Senectute Surselva organisescha ensemen cun Nadja Scolieri ell'«Ustria dalla staziun» a Cumpadials ina meisa da miezdi (gentar comunabel) inagada per meins, mintgamai il venderdis. Intent dalla meisa da miezdi duei esser da promover la cuminonza ella vischnaunca da Sumvitg e contuorn denter las personas ella vegliadetgna dalla pensiun. Plinavon dat ei la pusseivladad d'embellir quella occasiun cun star suentermiezdi da cumpignia e dar in scart troccas ni auters giugs.

Liug: «Ustria dalla staziun», 7176 Cumpadials

Datum: **venderdis, ils 14 da december 2018** allas 12.00

Annunzias: Ein da far entochen mesjamna sera tier «Ustria dalla staziun», Cumpadials

Tel. 081 943 19 22. Engraziel fetg e cordials salids *Pro Senectute Grischun*

### **Café Zeitlos a Mustér**

Café Zeitlos – in liug da sentupada per personas cun ina demenza, per tierparents ed interessai. In liug per passentar in suentermiezdi emperneivel, per s'informar e s'incuntrar. Ei drova negina annunzia. Il Café Zeitlos ei gratuits ed aviarts per tuts. La consumaziun surprenla PUNTREIS Center da sanadad.

#### **Datums per 2018:**

venderdis, 14 da december

Dallas 14.00–16.00 en PUNTREIS Center da sanadad, Via Cons 11, 7180 Mustér. Nus selegrein da Vossa viseta!